

ՍՓԻՒՌԷ, ԹԷ ՀԱՄԱՅՆՔՆԵՐ

Posted on August 25, 2022 by Keghart



Category: [Opinions](#)



Keghart.org, Խմբագրական, 25 Օգոստոս 2022

**«Տարբե՛ր ես դուն մեր երազէն. - անելի՛ լաւ...
Անելի լա՛ւ կ'ըսեմ այո՛, անզիջ, անզուրթ,...»
(«Ներկայ Հայաստանին», Վահան Թեքեան, 1933 թ.)**

Արդեօք ի՞նչ պիտի գրեր Վահան Թեքեան ա՛յս օրերուն...Կամ՝ արդեօ՞ք պիտի գրեր այս տողերը:

Արդարեւ, յատկապէս արեան գնով նուաճուած եւ ազատագրուած պատմական հողերու անփառունակ կորուստէն ետք (2020), հայրենի ժողովուրդին չափ անկումային տրամադրութեան եւ ընկճուածութեան մէջ մխրճուած է «սփիւռք» կոչուած այն հայութիւնը, որ Մայր Հողի վրայ չ'ապրիր զանազան պատճառներով կամ հանգամանքներու բերումով:

Եթէ անցեալին սփիւռքը, որ յատկապէս բաղկացած էր ցեղասպանութենէն ճողոպրած հայերով եւ անոնց զաւակներով ու թոռներով, այսօր այդ բաղադրութիւնը ի հիմանց փոխուած է եւ կը ներկայացնէ տարբեր պատկեր մը: Այսօր, առաջին իսկ հարեւանցի հայեացքով դիտելու պարագային՝ «սփիւռք» կոչուածը խայտաբղետ եւ անդէկ հաւաքականութիւններու հաւաքածոյ մըն է, զոր կը փորձեն ղեկավարել սիրողական մակարդակի մարդիկ՝ աշխարհիկ թէ հոգեւոր: Ապացո՞յց՝ սփիւռքի անդամալուծուած, բազմաձայն, հակասական եւ իրարամերժ խմբակներէ բաղկացած «եաները» կամ «յաները»:

Չանտեսելով առարկայական պատճառները, կը գտնուինք անմխիթար փաստի մը՝ առջեւ՝ հայ ժողովուրդի բացարձակ մեծամասնութիւնը ոչ միայն իր հայրենի փրկուած տարածքին վրայ չ'ապրիր, այլ կը միտի լքել «անհծեալ երկիրը» (շատերու բերանէն քաղուած խօսք մը):

Ռուսական Դաշնութեան մէջ այնքան հայ հաստատուած է որքան կ'ապրի ՀՀ-ի մէջ: Հիւսիսային եւ Լատինական Ամերիկաներու, ինչպէս նաեւ Եւրոպայի համայնքները ուռճացան ո՛չ թէ բնական աճի շնորհիւ, այլ Մայր Հողէն եւ Միջին Արեւելքի հայահոծ ու հայախօս գաղութներէն դուրս եկած հայութեան հաշուին: Արեւելքի հայութիւնը անելի լաւ հայ մնալու պայմաններէն փոխադրուած է ֆիզիկապէս եւ տնտեսապէս անելի նպաստաւոր պայմաններ ունեցող երկրամասեր, բայց հոս տեղի կ'ունենան այնպիսի գործընթացներ, որոնք հայութիւնը կը հեռացնեն իր արմատներէն «գլխու պտոյտ տուող արագութեամբ»: Այսպիսով՝ ողջ մնալու բնական եւ բնագոյային պահանջներէն փրկուելով ինկած ենք մեր հայ ինքնութիւնը կորսնցնելու ստոյգ իրականութեան մը գիրկը: Հայախօսութեան անկումը, խառն ամուսնութիւնները, ազգային կարգ մը աւանդութիւններու մարումը եւ անցեալէն կտրուիլը լաւագոյն ապացոյցներն են մեր ըսածին:

Այս իրականությունը քաջ գիտնալով, անցնող տասնամյակներուն մեր ղեկավարութիւնը, մտաւորականութիւնը եւ առանձին անհատներ որոշ յոյս մը կապած էին «մեր երազէն տարբեր, բայց աւելի՛ լաւ» հայրենիքի մը հետ: Յոյս ունէին, որ անկախացած ՀՀ-ն կամաց-կամաց ապահով հանգրուան մը պիտի ըլլար մեր զաւակներուն եւ թոռներուն համար, որոնք ստեպ-ստեպ հոն երթալով, շաղուելով հողին վրայ ապրող ու ստեղծագործող հասակակիցներուն հետ, պիտի դառնային հայախօս, կառչէին իրենց արմատներուն եւ ի վերջոյ շատեր հոն պիտի զարգացնէին իրենց տաղանդը...

Սակայն «տան հաշիւները շուկային մէջ չբռնեցին»: Հիմա նորէն շուարած, անճրկած, հարցական, սպասողական ու անտարբեր վիճակի մը մատնուած կը թուինք ըլլալ: Հիմա նորէն պետք է նոր ուղիներու եւ ռազմավարութիւններու դիմենք, նոր ծրագրումներու մասին մտածենք եւ դարձեալ երգենք «սփիւռքի կեանքը քիչ մը աւելի երկարացնելու» հին երգը:

Հոս նորէն կը ծագի «հայ սփիւռք» կոչուածը սահմանելու խնդիրը, որովհետեւ տարբեր ցամաքամասերու մէջ, նոյնիսկ նոյն ցամաքամասի տարբեր երկիրներու, մինչեւ իսկ նոյն երկրին մէջ գոյացած են այնպիսի գաղութներ ու համայնքներ, որոնք, բացի քանի մը նմանութիւններէ, կը պարզեն նաեւ զգալի տարբերութիւններ եւ առանձնայատկութիւններ: Մեր կարծիքով պետք է աշխատիլ նմանութիւններու վրայ հիմնուելով հասարակ յայտարարներ գտնելու ուղղութեամբ: Այս առումներով հետեւեալները կը յանձնենք հայութեան ուշադրութեան, յուսալով որ սկիզբ կ'առնէ առողջ եւ կառուցողական երկխօսութիւն մը սփիւռքի տարբեր գաղութներու տարբեր հոսանքներու եւ շահագրգիռ կողմերու միջեւ:

ա) Դպրոցաշինութիւն, թէ՛ եկեղեցաշինական մոլուցք: Կը հաւատանք թէ **դպրոցի՞ն** պետք է տրուի նախապատուութիւնը, որովհետեւ հայկական դպրոցին մէջ ալ կարելի է նոր սերունդին ջամբել հայ քրիստոնեայի դաստիարակութիւն:

բ) Հեռու մնալ այլամերժումներէ: Հրաժարիլ «մեր եկեղեցին» եւ «անոնց եկեղեցին» հասկացութիւններէ եւ այդ հողի վրայ ալ ստեղծուած զիրար մերժելու ավանդոյթէն: Նմանապէս պետք է խուսափիլ կուսակցական այլամերժութիւններէ:

գ) Բացայայտել եւ բացատրել **այլասերող գաղափարախօսութիւններու եւ աղանդաւորական շարժումներու** ժխտական ազդեցութիւնները:

դ) Քաջալերել եւ ընդարձակել երիտասարդական ցանցերու հնարաւորութիւնները համացանցային նոր աշխարհի մէջ եւ դիւրացնել այնքա՞ն անհրաժեշտ ԵՐԿԵՍՕՍՈՒԹԻԻՆԸ, որ ի վերջոյ կրնայ հասցնել ցանկալի համագործակցութեան:

ե) ՄԱՍՈՒԼ. «Ո՛չ» կուսակցականացած մամուլին, որ յաճախ լռեցուցած է ազատ խօսքի իրաւունքը: Փորձը ցոյց տուած է, որ անկուսակցական մամուլը չէ հանդուրժուած կուսակցական ղեկավարութեան կողմէ եւ անոր դէմ հալածանքին մէջ ցոյց տրուած է

«տիպար» համագործակցութիւն...:

Ստեղծել ազատ մամուլի ներկայացուցիչներու միջեւ կայուն հաղորդակցութիւն:

զ) Համա-հայկական ներկայացուցչական մարմին: Անցեալին եղած են նման փորձեր, բայց ձախողութեան են մատնուած նախ եւ առաջ կուսակցական նեղմտութեան եւ զանազան միջամտութիւններու եւ ճնշումներու պատճառով:

է) Անհողդողդ մնալ ՊԱՀԱՆՁԱՏԻՐՈՒԹԵԱՆ մէջ եւ մեր ամբողջ ներուժը «չծախսել» միայն ցեղասպանութեան ճանաչման վրայ: Կարելոր է յիշեցնել թէ սփիւռքը մնայուն իրականութիւն մը չէ, հետեւաբար պետք է նոր սերունդները դաստիարակել հայրենիք վերադառնալու տեսլականով, իսկ «հայրենիք» հասկացութեան մէջ կը մտնէ ոչ միայն Հայաստանի Հանրապետութիւնը, այլ անկէ կամայականօրէն փրցուած Արցախը, Նախիջեւանը, Ջաւախքը, Կարսի, Արտահանի եւ Սուրմալուի նահանգները եւ անշուշտ Պատմական Հայաստանը՝ ներառեալ Հայկական Կիլիկիան:

Comments



Harry Mardirossian – 2022-08-25 07:19:51

Ըստ իս եօթ այս առաջարկները պետք է պարզացուին քանի Սփիւռք կոչուածը գերբարդ է: Հիմնականօրէն, կան Ա-Պատմական, Բ-Ցեղասպանութենէն Վերապրած, Գ- Հայրենիքը Դասալքած սփիռքներ: Այս երեք շերտերէն ամենազարհուրելին եւ մտահոգիչը վերջինն է, որը կամովին կը շարունակէ լքել հայրենիքը: Ա եւ Բը կառավարելի եղած են, Գ-ը կը մնայ բարոյապէս անկառավարելի: Ինչ՞ ընելը կենսահարցն է:



Լուսիկ – 2022-08-25 07:12:12

Շատ ճիշտ դատողություններ են ու մտահոգություններ, հատկապէս չճշմունքներ և հային հայ պահելու, դպրոցներ ստեղծելու վրա ուշադրությունը սևեռելու առումով ևս: Կարծում եմ ճիշտ առաջարկություն է համահայկական խորհուրդներ ստեղծելու առաջարկը ևս, սակայն կարծում եմ սկզբում դա պետք է արվի յուրաքանչյուր երկրում, որտեղ կան հայկական համայնքներ, որոնք կբացահայտեն ու կվերլուծեն համայնքի խնդիրներն ու դրանց լուծման հնարավոր ուղիները, հետո նոր միայն դրանք կարելի է միավորվեն մեկ ընդհանուր խորհուրդ կազմելու համար:



Արմենակ Եղիայեան – 2022-08-25 03:28:28

Հիմա գոհանանք ներկայ Հայաստանով, աւելի ուշ ու յարմար ատեն մտածենք Արեւմտահայաստանի ու Կիլիկիայի մասին: